

四庫全書

子部

欽定四庫全書

冊府元龜卷四百九十

宋 王欽若等 撰

邦計部

蠲復第二

後魏道武天興元年正月車駕自鄴還中山詔大軍所
經州郡復貨租一年山東民租賦之半

二年八月除州郡民租賦之半

明元神瑞二年六月幸赤城復租一年南次石亭幸上

谷復田租之半七月還宮復所過田租之半

泰常二年十一月復州租稅

臣欽若等曰
史失州名

三年三月詔以范陽去年水復其租稅八月鴈門河內

大雨水復其租稅

四年四月南巡狩幸鴈門賜所過無出今年租賦五月

朔觀漁于灤水車駕還復一年租稅八月辛未東巡甲

申車駕還宮所過復一年田租

七年九月幸嶠山十月車駕還宮復所過田租之半

太武初即位南州大水百姓阻饑劉潔奏加哀矜帝從之於是復天下一歲租賦

始光四年十二月行幸中山復所過田租之半

神麤三年十一月帝幸紐城赦秦雍之民賜復七年

四年二月平赫連定還宮戰士賜復十年

延和三年二月詔曰朕承統之始羣凶縱逸西方未賓所在逆僭蠕蠕陸梁於漠北鐵佛肆虐於三秦是以旰食忘寢抵掌扼腕期在掃清逋殘寧濟萬寓故頻年屢

征有事西北運輸之役百姓勤勞廢失農業遭罹水旱
致使生民貧富不均未得家給人足或有寒窮不能自
贍者朕甚愍焉今四方順軌兵革漸寧宜寬徭賦與民
休息其令州郡縣隱括貧富以為三級其富者租賦如
常中者復二年下窮者復三年刺史守宰當務盡平不
得阿容以罔政治明相宣約咸使聞知

大延三年二月行幸幽州還幸上谷遂至代所過復田
租之半

太平真君四年六月詔復人貲賦三年其田租歲輸如
常牧守不得妄有徵發

文帝太安四年三月觀馬射於中山所過郡國賜復一
年

和平四年十月以定相二州實霜殺稼丐民田租

獻文以和平六年即位詔曰夫賦歛煩則民財匱課調
輕則用不足是以什一而稅頌聲作矣先朝權其輕重
以惠百姓朕承洪業上惟祖宗之休命夙興待旦惟民

之恤欲令天下同於逸豫而徭賦不息何以息煩去苛
拯濟黎元者哉今兵革不起畜積有餘諸有雜調一以
丐民

孝文延興二年十二月詔以代郡事同豐沛代民先配
邊戍者皆免之

三年二月戊午太上皇帝至自北討詔死王事者復其
家十一月詔以河南牧守多不奉法致新邦之民莫能
上達其有鰥寡孤獨貧不自存者復其雜徭年八十已

上一子不從役是歲州鎮十一水旱丐民田租

四年州鎮十三大饑丐民田租

承明元年八月甲申以長安二蠶多死丐民稅之半

太和三年王叡為吏部尚書見幸於文明太后詔與東陽王丕同入八議並受復除

四年秋七月壬子改作東明觀詔會京師耆老復家人不徭役

六年二月辛卯詔曰靈丘郡土既偏墦又諸州路衝官

司所經供費非一往年巡行見其勞瘁可復民租調十
五年乙未詔曰蕭道成逆亂江淮戈旗頻舉七州之民
既有征運之勞深乖輕徭之義朕甚愍之其復常調三
年八月分遣大使巡行天下遭水之處丐民租賦

七年春正月丁卯詔青齊光東徐四州之民戶運倉粟
二十石送瑕丘瑯邪復租筭一年是年苟頹為司空河
東王文明太后詔曰頹為台鼎論道是寄歷奉四朝庸
績彌遠宜加崇異以彰厥功自茲已後可永受復除

十一年十二月詔以汝南潁川大饑丐民田租

十一年五月詔復七廟子孫及外戚總服以上賦役無所與

十七年六月帝將南伐詔給充徐南豫陝岐東徐雒豫七州軍糧

十八年十二月癸卯詔中外戒嚴戊申復優代遺之戶
租賦三歲辛亥車駕南伐齊丁卯詔緣路之民復田租
一歲

十九年四月丁未帝自南伐齊迴曲赦徐豫二州其運
漕之士復租賦三年辛亥以齊蕭氏民降者給復十五
年六月詔復軍事從駕渡淮者租賦三年乙卯曲赦梁
州復民田租三歲

二十二年二月帝南伐齊至新野詔以穰民首歸大順
終始若一者給復三十年標其所居曰歸義鄉次降者
給復十五年三月詔以荊州諸郡民初降次附復同穰
十月帝北伐叛人發縣瓠曲赦二豫復民田租一歲

宣武景明二年三月詔曰比年以來連有軍旅役務既多百姓彫弊宜時矜量以拯民瘼正調之外諸妨害損民一時蠲罷九月免壽春營戶為揚州民

正始元年九月詔諸州蠲停徭役不得橫有徵發

四年十二月詔兵士鍾離沒落者復一房田租三年

延昌二年十月詔以恒泗地震民多死傷蠲兩河一年租稅

十二月丐雒陽河陰二縣租賦

孝明熙平元年七月詔兵士征破石者復租賦一年

二年五月詔曰揚州破石荆山新淮鄴城兵士戰沒者追給歛財復一房五年若無妻復其家一人二年

孝昌元年九月乙卯詔減天下租調之半

孝莊建義元年四月復天下租役三年

出帝太昌元年四月齊獻武王上言建義之家往為爾朱氏籍沒者悉皆蠲免帝以世易復除

東魏孝靜興和元年九月發畿內十萬人城鄴四十日

罷十月詔築城之夫給復一年

北齊神武為東魏相國武定二年三月以冬春亢旱請
孝靜蠲縣責

文宣以魏武定八年五月受禪改元天保詔曰冀州之
渤海長樂二郡先帝始風之國義旗初起之地并州之
太原青州之齊郡霸業所在王命是基君子有作貴不
忘本思深恩洽蠲復田租齊郡渤海可並復一年長樂
復二年太原復三年

天保八年自夏至九月河北六州河南十三州畿內八郡大蝗詔今年遭蝗之處免租

九年七月詔趙燕瀛定南營五州及司州廣平清河二郡去年蝥蝻滂損田兼春夏少雨苗稼薄者免今年租賦武成河清三年十二月周將尉遲迥寇雒陽及段韶大破尉遲迥等解雒陽圍丁卯帝至雒陽免雒州經周軍處一年租賦

後主天統三年九月太上皇帝

臣欽若曰武成以河清四年傳位稱太上皇帝

詔諸寺署所管雜保戶姓高者天保之初雖有優效權假力用未免者今可悉蠲雜戶任屬縣一準平人十一月以晉陽大明殿成大赦免并州居城太原一郡來年租賦

四年七月詔使巡省河北諸州無雨處境內偏旱者優免租調

後周閔帝元年三月壬子詔曰浙州去歲不登厥民饑饉朕用愍焉經行縣免一年租調九月辛未詔免長城

役者一年租賦

武帝保定二年五月以南陽宛縣三足烏所集免今年
役及租賦之半

建德三年十二月詔荆襄安延夏五州總管內其貧下
戶給復三年

四年正月詔刺史守令宜親勸農逋租懸調兵役殘功
並宜蠲免六月詔東南道四總管內自去年以來新附
之戶給復三年

宣帝以宣政元年六月即位詔山東流民新復業者及突厥侵掠家口破亡不能存濟者並給復一年八月於西郊詔長安萬年二縣民在京城者給復三年大象二年詔江左諸州新附民給復二十年

隋文帝開皇六年辛卯以關內七州旱免其賦稅

九年以江表初定給復十年自餘諸州並免當年租賦十二年有司上言庫藏皆滿帝曰朕既薄賦於人又大經賜用何得爾也對曰用處常出納處常入略計每年

賜用至數百萬段曾無減損於是乃更闢左藏之院構屋以受之下詔曰既富而教方知廉恥寧積於人無藏府庫河北河東今年田租三分減一兵減半功調全免十三年四月制戰亡之家給復一年

十八年七月詔以河南八州水免其課役

煬帝即位以戶口益多府庫盈溢乃除婦人及奴婢部曲之課

大業元年七月制戰亡之家給復十年十月己丑赦江

淮已南揚州給復五年舊總管內給復三年

二年四月辛亥御端門大赦免天下今年租賦

三年四月甲申頒律令大赦天下關內給復三年

四年八月辛酉親賜恒岳河北道郡守畢集大赦天下

車駕所經郡縣免一年租調

五年六月帝幸張掖御觀風行殿赦隴右諸郡給復一

年行經之所給復二年

八年四月赦詔以征遼凱旋其諸郡供軍事者並給復

一年其所役丁夫匠至涿郡者復二年至臨榆關已西者復三年至柳城郡已西者復五年至通定鎮已西者復七年至度遼鎮者復十年遼左之民仍給復十年

九年正月大赦改博陵為高陽郡給復一年

唐高祖武德元年五月即位赦削義師所行之處給復三年自餘給復一年

三年九月詔陝鼎熊穀四州給復二年

四年七月詔以平王世充竇建德其天下民庶給復一

年幽州管內久隔寇戎給復二年

五年五月勅荊州遭蕭銑之亂百姓無出今年田租

七年四月詔揚越之民新霑大化見在民戶給復一年

太宗以武德九年八月甲子即位赦制闕內蒲芮虞秦

陝鼎六州免二年租自餘率土普給復二年九月遣雍

州牧楊恭仁等分行突厥所掠之處損失家產及踐苗

稼者皆復之

貞觀元年夏山東諸州大旱詔無出今年租賦

四年十月幸隴州詔岐隴二州戶民無出今年租賦

十一年正月乙卯復雍州人無出一年租賦

二月幸雒陽宮三月詔免雒州管內一年租賦

十二年二月幸長春宮以舊經鎮復朝邑縣無出今年租賦降囚免徙

十三年正月朝於獻陵免其縣人一年租

十四年正月幸魏王泰宅免延康里百姓無出今年租

高宗上元二年正月勅雍岐同華隴等州給復一年自餘諸

州咸亨年遭旱澇虫霜損免之家雖經豐稔家產未復宜更免一年租

三年三月甲辰車駕自汝州温湯還東都詔免汝州田租之半

儀鳳三年十月詔以來年正月幸東都關内百姓宜免一年庸調及租并地子稅草其當道諸縣特免二年

永隆二年正月己亥詔雍岐華同四州六等以下户宜免兩年地稅河南河北澇損户常式蠲放之外特免一

年調

八月丁卯朔河南河北大水詔百姓乏食者任往
江淮南就食仍遣使分道賑給之屋宇壞倒者給復一
年

則天萬歲通天二年十月以定州北平義豐兩縣被契
丹侵掠堅守不降改北平為狗忠義豐為立節其守城
百姓並給復一年

長安四年四月則天幸興泰宮曲赦壽安縣百姓給復

一年福昌伊闕二縣免今年租賦之半

中宗神龍元年正月即位赦制諸州百姓免今年租賦
七月制河南百姓被水漂損者給復一年

景龍三年十一月南郊禮畢大赦關中諸州無出今年
地稅是月幸溫湯新豐百姓給復一年帝又幸始平送
金城公主出降吐蕃詔始平縣百姓給復一年

四年正月金城公主出降吐蕃二月曲赦詔天下百姓
免今年租半

玄宗開元二年十二月甲辰詔曰惟此新豐溫湯是出古之順豫義兼巡省頃者觀風數臨茲地以察寃滯詢于故老閭里歡康田疇墾闢况冬隆積雪春期有年且誦王遊果符時邁雖千乘萬騎咸給於主司而累月再來頗勤於除掃宜下復蠲之令慰其望幸之心新豐縣百姓免一年雜差科

五年二月行幸至東都制河南府百姓給復一年河南河北遭澇及蝗蟲無出今年租

八年二月詔曰朕臨御寰極永思政理黃屋成屈已之勞紫宸多在于之念嘗恐微物或失大道未臻私奉睿圖載深寅畏去年諸處並多水旱歲儲不給生業靡安言念下人用增憂盱天下遭損州逋租懸調及勾徵特宜放免

十一年正月行幸北郡詔太原府境內百姓宜給復一年九等戶給復三年元從家給復五年其家籍見存終身免征役二月壬子祠后土于汾陰勅管壇一鄉給復

一年辛未鑿駕至京師其行過處緣頓及營幕所損百姓青苗並令本州檢勘以正倉酬直懷澤兩州已免地稅潞州太原府亦有給復其汾晉蒲絳同華京兆河南供頓戶並宜免今年地稅鄭衛雒相儀沁磁隰等州佐助夫雖則役日不多終是往還辛苦各免戶內今年差科

十三年正月詔曰元率地稅以置義倉本防儉年賑給百姓頻年不稔逋租頗多言念貧人將何以濟今獻春

布澤務叶時和自開元十二年閏十二月以前所有未
納懸欠地稅宜放免十一月封泰山禮畢其行幸州縣
供頓劬勞百姓並免一年租賦兗州免二年租賦

十七年十一月謁橋陵詔天下百姓無出今年地稅之
半如已徵物聽折來年逋租懸調在百姓腹內者一切
放免京兆府供頓縣免今年地稅

十八年正月親迎氣於東郊禮畢制曰天下百姓今年
地稅並諸色勾徵欠負等色在百姓腹內未納者並一

切矜免

十九年十一月庚申辛東都壬子勅供頓州百姓及充
夫匠及雜祇供人等宜放今年地稅自餘戶等免今年
地稅之半

二十年九月戊辰河南道宋滑兗鄆等州大水傷禾稼
特放今年地稅十月辛北都曲赦太原給復三年

十一月庚申祀后土畢大赦制天下遭損免州及供頓
州無出今年地稅如已徵納聽折來年逋租懸調貸糧

種子欠負官物在百姓腹內者並宜放免諸州自開元十七年已前所有貸糧種子欠負官物百姓腹內者亦宜准此孝子順孫義夫節婦終身勿事管壇一鄉百姓給復三年

二十一年五月以皇太子納妃詔長安萬年兩縣百姓及今月當番人等並免其家今年地稅

二十二年二月秦州地震廨宇廬舍陷壞壓殺四千餘人詔壓死家復一年一家二人已上死者給復二年十

一月勅曰百姓屢空朕孰與足言念於此良所疚懷如聞京畿及闕輔有損田百姓等屬頻年不稔久乏糧儲雖今歲薄收未免辛苦宜從蠲省勿用虛弊至如州縣不急之務差科徭役并積年欠負等一切並停其今年租八等已下特宜放免地稅受田一頃已下者亦宜放免

二十三年正月乙亥籍田畢詔天下諸州貸糧種子並宜放免京兆河南府通懸欠負亦宜放免天下色役及

貢賦先令中書門下均融減省宜速與條奏六月戊子
制鰥寡惇獨免今年地稅之半江淮南有遭水旱處委
本道使賑給之

二十四年十月甲子自東都還京至陝州詔曰朕永懷
西土陵寢在馬至自東都誠慰罔極兼茲巡省且無怨
思僕予之望多謝哲王飲至之規豈忘前典其供頓州
應緣夫役差科並免今年地稅

二十六年秋七月己巳冊忠王璵為皇太子大赦天下

制曰至於磧西之人途路遙遠往復疲弊頗異諸軍其中願長往者已別有處分訖年鎮向滿應合放還未到之間稍宜假其家內諸色差科並宜放免如有營農不自辦者州縣量事助借各使存濟京畿近輔百姓所出雖庶務間省終異諸州其百姓等應單貧下戶者特放今年半租率土之內賜鬴三日

二十七年二月己巳加尊號大赦制天下百姓宜放今年地稅

二十八年十月戊辰詔曰如聞徐泗之間絲蠶不熟雖庸課已納慮百姓艱辛今年地稅特宜放免

天寶元年正月丁未朔御勤政樓受朝賀禮畢赦制如聞百姓之內或有人戶高丁多苟為規避父母在乃別籍異居且令州縣勘會其一家之中有十丁已上者放兩丁征行賦役五丁已上放一丁

六載正月詔天下百姓今載地稅並去載應損郡逋租懸調諸色勾徵變換等物及請延限並宜一切放免征

行之家每令存卹差科之際或未優矜自今已後並准
飛騎例蠲免

七載五月甲戌冊尊號畢大赦詔天下百姓今載地稅
并諸色勾徵欠負等色在百姓腹內未納者并一切放
免

十四載八月辛卯天長節大赦制曰聖人積不涸之倉
王者用無窮之府支計苟足多賦何為天下百姓今載
租庸並宜放免天下諸郡逃戶所欠租庸應復業者其

親隣已代出租庸不在徵賠之限

肅宗以天寶十五載七月即位於靈武改元至德詔諸
勾徵逋租懸調及官錢在百姓腹內並與放免

至德元載十月駕至彭原郡十二月詔彭原郡百姓給
復二年

二載十二月詔以討安祿山陣亡人家給復二年諸郡
縣或隔絕賊境則困於幽殘或犒宴官軍則弊於賦役
其本載租庸三分放一其天下百姓應諸色人勾徵及

欠負官物一切放免太原久遭圍逼給復三載上黨三
度被攻給復五載其南陽潁川靈昌睢陽雍丘等郡縣
堅壁多時力窮方下絕食尚守情亦可矜宜各給復三
載其好時奉先兩縣進退禦寇徵求復多各給復三載
蜀郡上皇親幸萬乘久居明年租賦宜依常式起復再
給復三載

三載正月冊尊號禮畢赦詔天下百姓今年租庸並放
其百司府縣諸色雜供各宜減半其雜徭役非要切者

一切並停其州因城陷被殺戮殘毀者委本道使勘責
取實各量免其二年租賦其流亡戶復業者委本道使
與刺史勾當賑給并與種子犂牛仍免三年租賦

乾元元年四月享廟禮畢詔天下百姓除正租庸外一
切不得別有使役十月冊成王為皇太子詔天下孝子
順孫義夫節婦終身勿事

二年二月丁亥詔天下州縣應欠租庸課稅傳馬粟貸
糧種子糴糶變稅及營田少作諸色勾徵納未足者一

切放免其正義等倉及諸色攤徵亦宜准此其至德二
年十二月三十日已前和糴和市并欠負官物及諸色
官錢欠利常平義倉欠負五色一切放免

三年二月詔其天下百姓灼然單貧交不存者緣租庸
先立限長行每鄉量降十丁猶恐編戶之中懸罄者衆
限數既少或未優矜其實不支濟者宜令每鄉量更矜
放

閏四月御明鳳門詔義夫節婦孝子順孫終身勿事

上元二年正月詔曰寇孽未平軍戎當備吐庶之內征賦猶繁朕所以親帥公卿躬行節儉而詔書屢下蠲免益多至國計軍儲取給而已猶欲累加損抑以惠黔黎以委中書門下勾當令度支使與諸供司一切減省應可蠲免每司各條件聞奏當使施行

三年九月詔義夫節婦孝子順孫終身勿事

元年建卯月御明鳳門詔孝子順孫義夫節婦終身勿

事

代宗寶應元年四月即位五月丁酉詔天下百姓逋租懸調貸糧種子諸色欠負官物一切放免

二年七月改元廣德制曰百姓逋租懸調及一切欠負官物等自寶應元年二月三日已前並放免一戶之中有三丁放一丁庸調地稅依舊每畝稅二升應徵稅租刺史縣令據見在戶徵科其逃亡死絕者不得虛攤隣保河北百姓復三年應是迴訖行營經歷處免今年租稅

廣德二年二月己亥親拜南郊祀昊天上帝禮畢大赦天下制其實應元年十二月三十日已前諸色逋欠在百姓腹內者並宜放免孝子順孫義夫節婦終身勿事三月辛丑詔河南府給復二年

十一月癸卯蠲免越州今年半租温州台州明州各給復一年

永泰元年正月御舍元殿改元制自廣德元年已前天下百姓所欠負官物一切放免在官典膳內者不在免

限其百姓除正租庸外不得更別有科率

二年十一月庚辰勅曰古者量其國用而立稅典必以
經費用之輕重公田之籍可謂通制履畝而稅斯誠弊
法期於折衷以便宜于時億兆不康君孰與足故愛人之
體先以博施富國之源必在均節朕自臨宸極比屬艱
虞嘗欲闡敦朴之風守冲儉之道每念黎庶思致和平
而邊事猶殷戎車屢駕軍興取給皆出邦畿九伐之師
尚勤王畧千金之費重困吾人乃者尊冉有之言守周

公之制什而稅一務於行古今則編戶流亡而墾田減
稅計量入之數甚倍徵之法納隍之懼當宁軫懷慮失
三農憂深萬姓務從省約稍異蠲除用申勤卹之旨以
救惇嫠之弊其京北府所奏今年秋稅八十二萬五千
石數內宜減放一十七萬五千石委黎幹據諸縣戶口
地數均平放免仍分明榜示百姓令知當戶所減斛斗
數訖奏聞其青苗地頭錢亦宜三分放一先欠永泰元
年地頭錢十四萬九千一百四十一貫並宜放免朕當

躬儉節用卹我黎元中夏漸寧庶有康濟宣示百姓知
朕意焉

大歷元年十一月甲子日長至帝御含元殿改元制其
逃戶復者宜給復三年

二年正月既平周智光

智光為同
華節度

元年十二月叛詔曰

求瘼卹隱諒在憂勤罷賦省徭與之休息况因師旅供
億頗繁故孝武悔征伐之事魏文隆田租之復同華兩
州百姓等項以賊臣背叛制在兇威淫刑以逞厚歛無

度閭閻之內行軸其空朕肝食增懷納隍自咎將問干紀之罪遂興無戰之師哀我斯人困於日費有牛酒壺漿之搗有資糧扉履之供凋殘之餘何以堪此言念刑弊豈忘優矜宜給復二年一切蠲免放仍委刺史縣令勞俸安集庶可小康宣示百姓使知朕意

三年六月辛丑詔曰夏后氏五十而貢殷人七十而助周人百畝而徹其稅皆什一也故謂之天下中正而頌聲作矣乃者因三代之制定其稅典務於行古庶以便

人屬以外攘四夷歲會戎事軍國用度公儲匱乏役費
薦至近於倍征而吏或奉法不謹失我字人之意孤惻
者資有厚歛豪富者貸以輕徭動而生奸浸而流弊稅
之什一其實大半致有去父母之邦逃庸保之役流離
逋蕩靡室可依沾於死亡而莫之省每一念至良深憫
惻頃以釐改從其便安置沃墾之差寬賦歛之重今邦
畿之內宿麥非稔去秋墾田又減常歲昨者徵稅其數
頗多朕以萬姓不安三農將廢憂勤鬱切中夜以興思

以康濟庶臻其道每欲悉免量入將悉其困而未解兵
嚴猶資日費用蠲常數以卹疲人其京兆府於今年所
率夏麥宜於七萬石內五萬石放不徵二萬石容至晚
田就後已雜色斛斗續納仍委京兆府尹崔昭差少尹
李椅于頎等分縣巡撫必躬必親宣示朝章令悉朕意
四年三月詔特免京兆府百姓今年稅錢

十一月乙卯詔京兆府今年稅量放十萬石仍令京兆
尹即與合審勘會不支濟戶先矜放百姓應納地稅及



草等各隨使送納不得勞人其諸司丁役及掌閑驍騎等宜委中書門下勘會其先出資並官出錢充不湏更有科率甲子詔曰比屬秋霖頗傷苗稼百姓種麥其數非多如聞村閭不免流散其大歷五年夏麥所稅特宜與減常年稅

是月乙亥勅曰王者以冢宰制國用司會質歲成必視豐荒之年以均賦入之數自近古以來天下郡縣或有水旱之處則亦減其田賦休其力役不急之務不便於

時亦皆節省以惠窮乏上天眷命屬朕黎元敢不敬承
勵于勤恤躬自儉薄刑于家邦非上薦宗廟下資軍旅
未嘗私于所奉更有徵求藏之於人孰謂不足乃者屬
減邦賦以勸農耕而四時固借九扈皆敘近自闕右達
于海隅溥其百穀之穰寧止三年之積非朕寡德所能
臻茲蓋祖宗景靈被此嘉貺仰荷殊慶兢懷益深而淮
南數州獨罹災患秋夏無雨田萊卒荒閭閻艱食百價
皆震永念於此良增慙然我念憂傷終夜不寐且有蠲


貸安用流亡其准上今年租庸地稅旨支米等宜三分
放二分

十二年元載主書卓英倩家在金州英倩附托元載權
倖上列及載大法英倩坐誅英倩弟英璘遂盜官器伏
擁子弟據險要以拒朝命帝發禁兵千人及山南西道
兵千人分道討之王師至英璘黨大潰是州以英倩之
故頗至殘傷特詔給復二年

十一月庚辰詔曰朕以黎元者君之肢體傷之則慘怛

賦稅者國之衣食均之則贍濟然特圖其本先假貧人使之獲安斯謂富國所以底慎財用蠲省征徭期致理於太寧庶自邇而及遠如聞巴南諸州自頃年以來西有蕃夷之寇南有羌戎之聚歲會戎事城出革車子弟困於征徭父兄疲於餽餉賦益煩重人轉流亡荒田既多頻歲仍儉戶口凋耗居邑蕭然去桑梓之重遷保山林以自活念性命於俄頃或逡巡於效攘傳不云乎窮斯濫矣顧共閭井夫豈不懷哀我矜人蓋非獲已朕之不

德自咎良深其邕蓬渠集壁光通開等州宜放二年租
庸及諸色徵科亦宜蠲免仍委本道觀察使及刺史縣
令切加招撫



冊府元龜卷四百九十

欽定四庫全書

子部
冊府元龜卷四百九十一
一至四

詳校官中書臣丁榮祚

侍讀臣孫球覆勘

總校官庶吉士臣何思鈞

校對官中書臣陸湘

謄錄監生臣何均

欽定四庫全書

冊府元龜卷四百九十一 宋 王欽若等 撰

邦計部

蠲復第三

唐德宗建中三年既誅李惟忠下詔易定深趙常冀節度觀察管內百姓除本道所用外者給復三年

興元元年春正月癸酉在奉天行宮受朝賀畢大赦改元制其奉天昇為赤縣仍給復五年在縣城內者給復

十年六月癸丑詔改梁州為興元府百姓給復一年已
已詔曰朕巡狩于南自春涉夏師旅殷會日費斯廣州
閭扞軸歲計其空東作妨時西成罕望雖僂俛從事人
不告勞而愧悼積衷予實知咎昨者減其租稅優以復
除庶乎有瘳汜用小息洎駕言旋軫躬履畏途絕碣縈
迴危棧綿亘時經途潦道路阻修工徒造舟縣人葺路
長幼耄耄莫獲寧居而又齋荷糗糧共備頓舍涉于千
里犒我六師居人露處而罔息宿麥過時而不獲覩此

妨奪彌增感傷前所蠲除未足酬卹式敷惠澤以艾大
勞其興元府除先減放秋稅給復外更給復一年洋州
除放秋稅外給復一年鳳州全放今年秋稅七月丙子
車駕至鳳翔詔鳳翔府管內今年秋稅及去年已前逋
欠並宜放免辛卯大赦制京兆府百姓普恩外給復一
年

貞元元年八月李懷光平詔河中府及同絳百姓並經
陷賊生業廢棄興言軫念良用憫然宜各給復一年

二年四月李希烈平詔淮西百姓等久經淪陷兼被傷
夷想茲凋殘實足哀愍除供當道軍用之外宜給復二
年將士之中不樂在軍願歸農桑者委節度使刺史量
給逃戶死戶田宅并借貸種糧優復終身使之存濟

三年十二月庚辰臘嘗畋於新店幸野人趙光奇家問
曰百姓樂乎對曰不樂帝曰仍歲頗稔何不樂乎對曰
蓋由陛下詔令不信於人所以然也前詔云兩稅之外
悉無他徭今非理而誅求者殆過之後又云和糴於百

姓曾不識一錢而強取之始云所糴粟麥納於道次今則遣至於京西行營動過數百里車摧牛斃破產奉役不能支也百姓愁苦如此何有於樂乎雖頻降優卹之詔而有司多不奉之亦恐陛下身在九重未之知也帝感異之因詔復除其家

四年正月一日大赦百姓逋欠一切放免九月詔曰興至化者務積於人故欲薄歛長國家者以義為利故使以時朕撫臨區夏宵旰忘勞苟可以助化濟人常思大

小皆益近以中夏甫寧頗勤經費遂收諸道停減將士糧料用叶權宜言念疲氓重茲供億其貞元四年已徵到及在路者即依前送其在百姓腹內者並放免五年已後每年各收一百萬八十八貫石亦宜放免委本道觀察使各具當管州所放聞奏并曉示百姓初建中末國家多難諸道咸加詔將士赴國難兩稅外別徵資糧以給之及復京師悉罷歸農去歲宰相李泌請自貞元二年已後追收其資費納於戶部謂之諸道減將士錢

乃遣度支員外郎元友直巡州府搜索之既而稅輸錢
米百餘萬人力殫竭殆不堪命使臣多懇訴帝濡然而
悟特詔免之自是東南之甯復安其業

六年閏四月早詔京兆府諸縣田合徵夏稅者除水利
地外一切放免其廻種秋苗者亦不在收稅限

八年秋八月江淮荆湘陳宋至於河朔連有水災十二
月詔曰惠下卹人先王之政典視年制用有國之常規
故有出公粟以振困窮施歲征以寬物力乃者諸道水

灾臨遣宣撫省覽條奏載懷憫惻其州縣府田苗損五六者免今年稅之半七分已上者皆免委度支條以聞奏朕撫臨億兆思致和平理化未臻良增愧畏

十二年十月詔京兆府所奏奉先等八縣旱損秋苗一萬頃計米三萬六千二百石青苗錢一萬二千八百貫比緣春夏少雨秋稼或傷頃畝雖損非多黎庶猶慮艱食况畿甸之內供應實煩須有優矜以寬疲瘵其所奏損特宜放免先是州府奏水旱損苗別差官檢覆多有

異同之議又追集人戶煩擾州府至是帝知其弊故特
允其奏朝野歡慶

十四年正月詔曰朕臨御兆人為之父母思底于道俾
安其生然則邦計不可不供封陞且以集事而累經水
旱或有流庸積成逋懸寢以凋瘵每念於此惕然疚懷
中宵以興思拯其弊將以憫其疾苦致於康寧豈可更
擾疲人尚為徵歛宜弘善貸以惠困窮其諸道州府應
欠負貞元八年九年十年兩稅及權酒錢總五百六十

萬七千餘貫在百姓腹內一切並免如已徵得在官者
宜令所司具條疏聞奏於戲天生蒸人君為司牧百姓
不足過實在予永思其艱載用祇畏宣示中外令知朕
懷輿議以所欠錢物等多是浮於編氓腹中各已逃移
年月且久縱令所司徵納亦無從而致雖有此詔亦無
益於百姓矣

十八年二月免京兆府逋稅二萬二千貫七月蔡申光
三州言春大水夏大旱詔其當道兩稅除當軍將士春

冬衣賜及支用外各供上都錢物已徵及在百姓腹內
量放二年

二十年二月詔曰去夏迄秋頗愆時雨京畿諸縣稼穡
不登朕用軫慮愧為其父母今宿麥未收其逋租宿貸
六十五萬貫石宜蠲除之禮化之本繫乎京師副朕憂
人屬於長吏宜勉務農桑各安生業以諭朕懷

順宗以貞元二十一年正月丙申即位二月甲子大赦
天下衆百姓應欠貞元二十一年二月三十日已前權

酒及兩稅錢物諸色逋懸一物已上一切放免京畿諸縣應今年秋夏青苗錢並宜放免

六月丙申詔曰朕君臨寰海子育兆人思欲阜其財求俾遂生殖然後導之以禮樂齊之以政刑興康讓之風洽和平之理而比聞官司之內尚有逋懸每念黎蒸用深憂軫永言勤恤宜有蠲除其莊宅使從興元元年至貞元二十年十月三十日已前畿內及諸州府莊宅店舖車坊園磴零地等所有百姓及諸色人應欠租課斛

斗見錢純絲草等共五十二萬餘並放免朕方與人休息致之富壽物有不得其所事有可利於人寤寐求思予無所愛宜加曉示令悉朕懷

憲宗永貞二年正月即位其月丁卯詔京畿諸縣今年青苗錢及權酒錢並宜放免地稅率與每斗糧放二升江淮荆襄等十州管内水旱所損四十七州減放米六十萬石秋稅錢六十萬貫

元和元年九月西川平十月詔西川百姓等久陷克逆

不免傷殘其兩稅錢等委本道觀察使量與矜減其東川州縣及山南西道當克徒焚剔之後王師攻取之辰發輓饋軍繕完補缺一日之費豈止千金三軍所資盡出百姓永惟勞弊朕所軫懷其東川元和二年上供錢物並放留州留使錢委觀察使量事矜減仍具數奏聞山南西道元和二年上供錢量放一半

二年正月辛卯有事於南郊還御丹鳳樓大赦天下制天下應有逋欠在百姓腹內者及京畿今年夏青苗錢

並放免淮南江南去年已來水旱疾疫其租稅節級蠲放

是月又詔曰令人有產子者復勿算三歲令諸懷妊者賜胎養穀人三斛復其夫勿算一歲著以為令二月壬申制以浙江西道水旱相乘蠲放去年兩稅上供三十萬餘貫

四月戊午朔庚申制以劍南西川所管新羅兵革蠲放去年兩稅權酒上供錢五十六萬餘貫今年者免其半

七月辛卯蠲劍西南川常賦錢米貫石七十餘萬以經
劉闢亂故也

十月潤州將張子良等既擒逆賊李錡制曰每念疲阨
久罹虐政而又迫于逆命驅以饋軍攫歛則灌以漏卮
傷殘則烈於猛火永言於此如納諸隍宜申蠲貸之恩
冀息歌吟之苦其潤州今年秋稅未徵納者一切放免
其管內諸州如李錡作亂之後橫加徵剝委元素審加
勘責具色目聞奏其權酒錢亦宜處置聞奏

四年正月詔元和三年諸道應遭水旱所損州府令放兩稅錢米等損四分以下者宜准此處分損四分已上者並准元和元年六月十八日勅文放免

六年二月甲午勅泗州二年水旱所損不虛其欠元和五年錢四千六百四十貫米三千一百石等宜並放免四月丁亥浙江東道觀察使李遜奏當道台明溫婺四州貞元五年准詔權加官健一千五十八人今請停罷歸農其衣糧稅外所徵錢米並請蠲放從之又免鄂岳

道逃戶錢十三萬五千貫

十月戊寅制曰朕聞王者之牧黎元也愛之如子視之如傷苟或風雨不時稼穡不稔則必除煩就簡惜力重勞以圖便安以阜生業况邦畿之內百役所叢雖勤郵之令亟行而供億之制猶廣重以經夏炎曠自秋霖霖南畝虧播植之功西成失豐登之望內乏口食外牽王徭豈惟轉徙之虞慮有餒殍之患斯蓋理道猶鬱和氣未通永言于茲良所咎歎宜加惠貸式示誠懷比者每

令折糴本以便人為意今田穀所收其數既少必恐徵納之後種食不充其京兆府宜放今年所配折糴粟二十五萬石如百姓有粟情願折納即於時價外特加優饒與納仍令當處收貯委度支逐便支用今春貸百姓義倉斛斗屬歲早歉須議優矜宜令所司容至豐收日徵填京兆府從元和五年已前諸縣租稅有逋懸錢在百姓腹內者放免其百姓職田數額甚廣近緣水潦道路不通計搬運腳價所費猶倍務令寬濟使其安存其

破損外職田粟宜令逐近貯納仍委度支隨便支用其
職田粟送城脚價亦宜放免百官今年本分職田粟據
損數外宜令於太倉請受其草及水田租既緣城中無
可迴給即宜據損數外准舊例令今年畿內田苗應水
旱損處無聞至今檢覆未定又屬霖雨所損轉多有妨
農收慮致勞擾其諸縣勘覆有未畢處宜令所司據元
訴狀便與破損不必更令檢覆其未經申訴者亦宜與
類例處分朕以為理之本在乎安人咨爾尹京宰邑之

臣實惟親人阜俗之寄必當詢其疾苦奉職詔條恤隱
為心無怠於事罔或徇利以刻下吐剛而茹柔使閭井
或安惇娶復濟各勉忠效宜悉朕懷

閏十二月乙巳勅畿內百姓頃以秋稼旱損農收不登
言念疲黎每務矜恤乃者詔命既下各已加恩如聞村
閭之間尚慮乏食更宜優貸以惠吾人其粟及大豆除
已徵納外見在百姓腹內者宜令全放青苗錢欠在百
姓腹內者量放一半

七年二月庚寅制元和六年諸色稅草並職田草共一百一十五萬束並宜放免又有常賦錢穀蠲放之餘貧弊者多慮難輸入欲令寬恤須有優矜其京兆府欠去年兩稅青苗等錢二萬一千八百貫欠秋稅雜斛斗及職田粟五萬三千三百石並宜放免元和六年春賑貸京畿百姓義倉粟二十四萬石亦宜放免

九年二月詔應京畿百姓所欠元和八年秋稅斛斗青苗錢稅草等在百姓腹內者並宜放免

五月癸酉以京畿旱免今年夏稅大麥雜菽合十三萬石並隨地青苗錢五萬貫

十年十月戊申罷四道兩稅

十一年四月己未制曰疆理宇內必先於京師惠綏四方亦始於中國蓋以千里之壤百役是資俾其不足吾孰與足頃自春及夏時澤未降恐失順成之道或生歉儉之災是以仰瞻昭回俯察田畝喜獲朝濟之潤方寬夕惕之憂思遂康寧盡蠲逋負其京畿百姓所有積欠

元和九年十年兩稅及青苗并折糴折納斛斗及稅草等除在官典所由腹內者並宜放免

七月丙戌以淮西四面諸州隣賊乏食蠲放夏稅錢米有差

十二年七月甲子勅淮西四面州縣夏稅並宜免放
九月丁未詔免淮西四面之州秋稅

十月己卯淮西平甲申詔淮西百姓給復二年仍委州縣長吏設法安撫

十三年正月一日赦書其度支元和二年已前諸道借便及縣欠錢物斛斗雜物當四百八十餘萬貫石端匹枚具斤兩等並放鹽鐵戶部諸監院應有欠負亦疎理減放

十四年五月乙酉勅京畿之內供億所叢雖年穀比登而人食尚寡俾其存濟實在優矜其京兆府及諸縣今年夏稅大麥等共九萬四千六百九十四石並宜放免七月己丑帝御宣政殿冊尊號禮畢大赦天下京畿今

年秋稅青苗及榷酒錢每貫量放四百文從元和五年至十年已前諸縣百姓欠負錢物斛斗等委京兆府疎理減放淮南浙江東道宣歙江南西道湖南福建山東道荆南等九道今年秋稅錢合上供者每貫量與減放度支鹽鐵戶部應有逋懸並委本司疎理具可放數聞奏

穆宗以元和十五年正月即位二月丁丑御丹鳳樓降赦詔度支諸州府監院從貞元八年已後至元和十年

已前共計欠錢一百一萬五千九百餘貫監錢使諸監院應欠元和十三年已前錢物除准前制疎理外共計一百八萬八千六百餘貫石等戶部諸州府從建中三年已後至元和十三年已前應欠在州貧窮並遭水旱逃亡百姓腹內兼連接淮西河南賊界並燒劫散失及賑貸百姓錢物五十萬九百餘貫石等京兆府從元和五年已後至十三年已前應欠諸色錢物共四十一萬九千六百餘貫石東等州府監院百姓欠負但在官典

所由腹內者一切放免內外百官食利錢一倍至五倍
已上節級放免

四月勅京畿二十有二縣欠元和十四年京百司職田
二十二萬九千一石束貫等京畿百姓聞甚艱貧頃差
搬運軍糧今又修營陵寢雖應緣驅役皆給價錢而屢
有牽召頗妨農畝豈可更徵懸欠重使憂愁其所欠並
宜蠲免其合受納所欠職田或見在官班各請厚俸或
近終考職稍有餘資宜體朕懷以寬人力

六月京兆府上言興平醴泉縣雹傷夏苗請免其租入
九月宋州奏雨水敗田稼六千頃請免今年租入並從
之

長慶元年正月辛丑郊禋禮畢大赦天下制度支鹽鐵
戶部三司官吏所由欠負元和十三年已前諸色錢物
斛斗委本司盡勘責如是入已侵欺即准條處分如緣
欠折攤徵元保外無可納者宜並與疎理諸軍諸使亦
准此處分兩稅外不得別有科率

四月己丑河南尹韋貫之請以去年夏末至今年夏初
供館驛外殘錢一萬三千五百八十貫草九萬五百八
十束代百姓填元和十一年至十五年逋欠及今年夏
稅從之

七月己酉冊尊號禮畢大赦制京畿諸縣及度支鹽鐵
戶部欠負各疎理放免有差

二年八月既誅李齊汴州平下詔其三州界內有兵馬
所到縣百姓或被驚擾處宜於今年稅內三分量放一

分

敬宗以長慶四年正月即位三月詔京畿諸縣應今年夏青苗錢並宜放免秋青苗錢並河南府夏青苗錢每貫放三百文其京兆府除所放青苗錢外更放錢五萬貫斛斗五萬石河南府除所放青苗錢外亦更量放三萬貫斛斗二萬石

文宗太和元年春正月即位勅制京兆府今年夏稅青苗量放一半

八月詔三原縣百姓今年秋青苗錢並放免高陵縣量放一半

二年十一月以棣州平詔應在境內百姓宜復一半

三年十一月庚子京兆上言奉先富平美原雲陽華原三原同官渭南等八縣旱電損田稼二千三百四十頃有詔蠲免

四年十二月京畿及河南江南荆襄鄂岳湖南大水害田稼官出米賑給蠲免其田稼官租

五年十月丁卯京兆府上官奉先渭南縣今年夏風電
暴雨害田稼至是請蠲免其租可之壬午度支奏據屯
田郎中唐扶鄧州內鄉行市黃潤兩場倉督鄧琬等先
主掌貞元二年湖南江南運到糙米至浙江於荒野中
權造囤盛貯差鄧琬等交領除支用外六千九百四十
五石多年衰爛已成灰塵准度支牒徵原主掌所由從
貞元二十年已後所由鄧琬父子兄弟至玄孫相承禁
繫經今二十八年前後禁死九人適孫及玄孫等四人

見枷禁奉勅如聞鹽鐵度支兩使此類至多其鄧琬四
人資產全以賣納繫禁動經三代死於獄中實傷和氣
其鄧晟等四人勒責保放出仍委兩使都勘天下州府
監院更有此類但禁經三年已上者一切與疎理各具
事由聞奏

七年正月詔京兆府太和六年青苗權酒錢在百姓腹
內者並放免京兆河中同華陝虢晉絳等州府自太和
六年秋稅已前諸色逋懸在百姓腹內悉放免

八年二月庚寅詔為政之要必在去煩厚下之恩莫先
已責應度支戶部鹽鐵積欠錢物或因繫多年資產
已盡或本身淪歿展轉攤徵簿書之中虛有名數囹圄
之下常積滯寃言念于斯所當矜恤其度支戶部鹽鐵
應有懸欠委本司具可徵放數條以聞奏不得容有奸
濫京畿諸司使食利錢已納利計五倍已上者本利並
放免其有攤徵保人納利計兩倍已上者其本利亦並
放免

九月丁卯詔淮江浙西等道仍歲水潦其田苗全損處全放其年青苗錢餘亦量議蠲減

開成元年正月一日御宣政殿朝賀禮畢詔其戶部度支鹽鐵應有諸色欠負太和五年已前者並放免京畿百姓兩稅已降凡一歲之內徵取者並百官職田並全免一年河中同州絳州去年旱歉賦歛不登宜特放免開成元年夏青苗錢

四月詔曰遠人征賦每歲徵輸言念辛苦暫為蠲免其

安南今年秋稅悉宜放免委都護田早集百姓曉示恐
軍用闕絕宜賜錢二萬貫以頒南觀察使合送兩稅供
錢充

二年三月壬申詔揚州楚州浙西管內諸郡如聞去年
稍旱人罹其災豈可重困黎元更加誅歛爰布蠲除之
令用叶極物之情宜委本道觀察使於兩稅戶內不支
濟者量議矜減今年夏稅錢每貫作分數蠲放分折速
奏仍於上供及留州使額內相均落下務令蘇息

十月河南府上言今秋諸縣旱損并雹降傷稼請蠲賦稅從之

十一月甲戌戶部侍郎李班奏廬州舒縣太平鄉百姓徐行周叔姪兄弟五代同居請免其同籍戶稅從之

十一月宣歙觀察使崔鄆奏溧陽縣百姓陳班請蠲復賦稅從之

三年正月詔淄青兗海鄆曹濮去秋蝗虫害物偏甚其三道有去年上供錢及斛斗在百姓腹內者並宜放免

今年夏稅上供錢及斛斗亦宜全放

六月諸道征鎮各奏准詔停進奉以放貧下戶租稅

十一月以妖星見降詔京畿之內百役繁興欲其阜安切在優卹其今年二月二十五日勅賑貸諸縣百姓糧種粟八萬四千九百七十八石如聞數內半是義倉斛斗此乃救災之備豐年自合收填其餘有戶部管係者並且停徵以候來歲畿內諸縣應有開成元年已前諸色逋欠並宜放免仍委度支與府司同檢勘聞奏如是

官吏破用不在此限

武宗會昌六年二月壬申朔癸酉制天下州府耄老惇獨及殘疾窮困交不存濟戶今年夏稅並放免

懿宗咸通二年二月鄭滑節度使李福奏屬郡潁州去年夏大水雨泥邱汝陰潁上等縣平地水深一丈田稼屋宇淹沒皆盡乞蠲租稅從之

四年七月詔安南管內被蠻賊驅劫處本戶兩稅丁錢等量放二年候收復後別有指揮

僖宗廣明元年五月乙卯詔自廣明已前諸色稅賦宜令十分減四分其河中府太原府遭賊掠處亦宜准此哀帝天祐元年八月即位二年四月德音修奉園陵役費夫匠車牛宜令錄奏優復一年

梁末帝貞明六年四月己亥詔曰王者愛育萬方慈養百姓恨不驅之以仁壽撫之以淳和而炎黃有戰伐之師堯舜有干戈之用諒不獲已其猶病諸然則去害除妖興兵動衆殺黑龍而濟中土刑白馬而誓諸侯終能

永逸暫勞以至同文共軌古今無異方冊具存朕以眇
末之身託億兆之上四海未艾八年于茲業業兢兢日
慎一日雖踰山越海肅慎方來而名兩徵風虫尤尚在
顧茲殘孽勞我大邦將士乂於戰征黎庶疲於力役木
牛暫息則師人有不爨之憂流馬盡行則丁壯有無聊
之苦况青春告謝朱夏已臨妨我農時迫我戎事永言
大計思致小康宜覃在宥之恩稍示殷憂之旨用兵之
地賦役實煩不有蠲除何使存濟除兩京已放免外應

宋毫輝潁鄆齊棣滑鄭濮沂密青登萊淄陳許均房襄
鄧泌隨陝華雍晉絳懷汝商等三十二州應欠貞明四
年已前夏秋兩稅并鄆齊滑濮襄晉輝等七州兼欠貞
明四年已前營田課利物色等並委租庸使逐州據其
名額外數目矜放所在官吏不得淹停制命徵督下民
致恩澤不及於鄉閭租稅虛損於帳籍具有表私遠年
債負生利過倍自違格條所在州縣不在更與徵理之
限兗州境內自張守進違背朝廷結連蕃寇久勞攻討

頗困生靈言念傷殘尋加給復

龍德元年五月丙戌詔應欠貞明三年四年諸色殘欠
五年六年夏秋殘稅並放

七月以陳州平

先是州刺史惠王友能叛命張漢傑討之

勅開封府太康襄

邑雍丘三縣遭陳州賊軍奔衝其夏稅只據見苗輸納
後唐莊宗同光元年四月即位詔應諸道管內有高年
踰百歲者便與給復永俾除名自八十九者與免一
子役州縣不得差徭其雲應邊陲山北八軍易定幽燕

邊陲諸縣自鮮卑入寇仍歲纏災暵彼流人良堪興歎
或乍來復業纔擬營農尚怯侵搔湏加慰卹其稅率仍
為長吏量與矜減凡有痛毒孤貧惇嫠寡歷代皆缺
於教化自古共切於軫傷免致噢咻遍加惠養應有欠
負不繫公私若曾重重出利累累經徵理填還不迫者並
皆釋放

十月詔曰理國之道莫若安民勸課之規宜從薄賦庶
遂息肩之願冀諧鼓腹之謠應諸道戶口並宜罷其差

役各務營農所係殘欠賦稅及諸務懸欠積年課利及公私債負等其汴州城內自收復日已前並不在徵理之限應天下諸道自壬午十二月已前並收其兵戈蹂躪之地水旱災沴之鄉苗稼不登征賦宜減應今年經電旱所損田苗處檢覆不虛據畝壟蠲免兼北京及河北先為妖祲未平配買征馬如有未請官本錢及買馬不迨者可並放免

二年二月詔曰水旱之鄉饑寒宜卹兵戈之地勞弊堪

傷鄴都及河東又興師旅頗困生靈其近京州縣又輦
運徭役無時暫息應北京以北諸州川界及至新州幽
州鎮定管界契丹侵掠井邑凋殘兼遼州沁州南界及
安義北界澤州諸縣河陽向下至鄆濮齊棣以來邊河
州縣數年兵革至甚凋殘自此並宜倍加撫安台令復
業應人戶所輸稅租特與蠲減已從別勅處分兼諸道
州縣有經電水旱之處所損田苗納稅不迫懸欠處仰
仔細檢詳如不虛妄特與蠲放

五月勅治國之由安民是本如聞今歲麥田雖繁而結實不廣其四京諸道百姓於麥察地內種得秋苗並不徵稅

十一月中書奏天下州府今秋多有水潦處百姓所輸秋稅請特減以慰貧民勅俟來年蠲免

二年二月甲子朔詔曰間者以皇綱中墜國步多艱率兵甲於兩河漲烟塵於千里憂勤二紀勞役萬端矧乃東京國號大名雄稱全魏昔惟廣晉今實興唐自朕南

北舉軍高低協力總六州之疆土供萬乘之征租有飛
芻輓粟之勞有浚壘深溝之役賦重而民無嗟怨務繁
而士竭忠勤致于掃盪氛霾平除偽逆九廟復烝嘗之
薦兆人息塗炭之灾靜想寅緣深所嘉歎昨者因追曩
素載洽歌謠俱懸望幸之誠遂舉省方之典爰臨管界
洎至都城對父老之歡呼睠懷斯契睹井田之凋廢臨
馭增慙得不特降優恩俾蘇舊地異表寵綏之道免渝
敷激之風應東京隨絲鹽錢每兩俱減放五十文逐年

俵賣蠶鹽大鹽甜次冷鹽每斗與減五十文樂鹽與減三十文其小菜豆稅每畝長與減放三升都城內店宅園圃比來無稅頃因偽命遂有配徵後來原將所徵物色添助軍人衣賜將令通濟宜示矜蠲今據緊慢去處於見輸稅絲上每兩作三等酌量納錢貴與充本迴圖收市軍人衣賜其絲永與除放所有六街內空間田地並許新歸業人戶逐便蓋舍居止與免差徭如是本主未來一任坊隣收佃庶令康泰俾表優恩

三月車駕自鄴至澶州辛亥次於德勝鎮頓丘縣人王
遇等一百五十人遮道訴曰臣等墳墓田園陛下數年
列柵在內桑棗為寨木田園成溝壘十年在外去歲方
歸帝憫然許復一年

四年正月壬戌制應同光三年經水災處有不迨及逃
移人戶差科夏秋兩稅及諸折配委官吏切加點檢並
與放免仍一年內不得雜差遣壬午年已前百姓所欠
秋夏殘稅及諸色課利錢物先有勅文悉已放免近聞

或不遵守依前却有徵收仰下租庸司及諸道州府切
准前勅處分其同光元年當戰伐之後是平盪之初人
戶流離多未復業固於租賦須議矜蠲其諸色殘欠差
稅及不迨係官課利並與放免三蜀管內百姓除秋夏
兩稅及三司舊額錢物斛斗並繼宓崇韜申奏減落徵
收外所有無名配卒急徵橫歛毒害生靈者更委本道
新除節度使已後於管內一一檢勘細具聞奏當與放
免

大正十二年

冊府元龜

三七

--	--	--	--	--	--	--	--

冊府元龜卷四百九十一

欽定四庫全書

冊府元龜卷四百九十二 宋 王欽若等撰

邦計部

蠲復第四

後唐明宗天成元年四月即位下制曰昨自魏汴至京
大軍所歷戎馬騰踐麥苗下本州使簡量據所傷踐與
蠲地稅諸色殘稅自今年四月一日已前並與放免如
已徵入州縣者即據數納省若取官中迴圖錢立契取

私債未曾納本利者不在此限其餘並不徵理

十一月癸未鎮州并盧文進所率歸業戶口奉詔放租
稅三年仍每口給糧五斗訖

二年十月戊戌詔曰諸道州府自同光三年已前所欠
災秋夏稅租并主持務局敗闕課利并汧河舟船折欠

天成元年欠夏稅租並特與除放

時安重誨既構任圜
之禍恐人非之恩市

恩於眾以
掩已過

辛丑詔曰朕聞后来其蘇動必從於人欲天

監厥德靜且布於國恩近者言辛浚郊暫離雒邑蓋逢

歲稔共樂時康不謂姦臣遽彰逆狀為厲之階既甚覆
宗之禍自貽俾我生靈遘茲紛擾永言軫惻無輟寐興
宜覃雨露之恩式表雲雷之澤應汴州城內百姓既經
驚劫須議優饒宜放二年屋稅兼公私債負如是在城
迴圖錢物及公私質庫除點簡見在外實經兵士散計
者不計年月遠近並宜蠲放應有年八十已上及家長
有廢疾者宜免一丁差役夫天災流行時雨愆亢既闕
地分宜減國稅今歲岐華登萊自夏稍旱須加軫念以

示優恩四州所管百姓宜令長吏切加安卹其所旱損田苗宜令簡行詣實申奏與蠲減稅租仍不得輒有差徭科配

四年正月勅會計之司租賦為本州縣之職徵科是常儻不切整齊必漸滋僥倖今聆舉奏果有逋懸非朝廷之立法不嚴蓋官吏之慢公頗甚緣當獻歲未欲加刑宜顯示於新條貴永除於積弊其天成元年應欠秋稅特與據數放免

三月勅王都負國命將除克攻伐之勞朕所嘗憫搬運之苦朕實備知近自收城方期罷役宜加矜卹徧示優饒其鄴都幽鎮滄邢易定等州管內百姓除正稅外免諸色差配庶令生聚並獲舒蘇

長興元年二月南郊畢詔天成四年十二月終已前諸道州府人戶應有殘欠稅物蠶鹽之乾榷濕榷既係積年之欠俄逢作解之恩並與放免諸州府營田戶部院應欠租課房店利潤逃移人戶死損牛畜或先遭剽劫

及水滂處欠負斛斗無可徵填已收納到家產財物其餘所欠並與蠲除所在倉場積年損爛使臣盤覆欠折尤多其主持專知官等據通收到產業物色外亦與豁免應諸道商稅課利撲斷錢額去處除納外年多虧欠枷禁徵收既無抵當並可豁免諸道採造材木欠數定州材木錢及閩鄉船務遭火所燒所司累行催促無可徵填亦與放免先南北面軍前倉場主持損爛欠折及江河轉運拋失舟船并斛斗芟桿錢諸鎮欠少過軍准

備糧草等據主持人見在家業並勒收納外除放所欠
天成元年二年諸州舡納上供到庫秤盤積欠物色并
曾遭兵火燒劫及耀州前後身死刺史界分欠省庫錢
物却勒州司官吏陪填者並特放免天成二年終諸色
人於西川省庫內借過錢并省司先差人收買羊馬欠
折死損無可填還及天成二年終已前諸道銀銅鐵冶
鉛錫水銀坑窟應欠課利兼木炭農具等場欠負亦與
放免河陽管內人每畝上舊徵橋道錢五文今後並放

不徵諸道州府人戶每畝上元徵麴錢五文今特放二
文祇徵三文

三年五月襄州奏水高二丈壞城欲盡乞蠲人戶麥稅
從之

十月庚戌襄州奏漢江暴溢廬舍田稼並盡無可徵稅
請特免從之

四年三月辛丑勅叛黨未平難輟轉輸之役流民既復
必資安集之謀朕應天順人端居靜治若涉大水如履

薄冰翼翼乾乾懼不克荷所賴文武宣力天地降祥雨
順風調政寬事簡雖四夷一主遠殊貞觀之朝而斗粟
十錢近比開元之代無何董璋構亂蜀郡纏災萬方共
樂於太平一境獨嗟於多事遂致數年動衆千里勞民
奔馳秦鳳之郊委頓岷峨之路益彼樂禍非我願為今
則逆順分明車書混一陸梁之黨已歸葭醢之刑渙汗
之恩宜及瘡痍之俗示以歸還之路慰其懷戀之誠應
奏岐延涇寧慶邠同興元京兆等州府所欠長興元年

二年夏秋稅賦諸色錢物及營田戶部庄宅務課利等物並放如聞州使廉察自前每降勅書稍闕除放頗淹行遣轉急徵催物已輸官人方見榜厚利實歸於州縣鴻恩虛及於生靈而况一戶逃移一村搔擾殘欠之物蓋藏於形氣腹中披訴之詞指注於逃亡脚下朝廷比哀貧戶州縣轉啓倖門欲峻條流宜先曉諭今後勅到畫時曉諭所管仍勒要路粉壁曉示如勅未到時已徵到物色據數附帳不得隱落如有人陳告以枉法贓論

勅到並須半月內施行除放訖奏聞

八月戊申受尊號畢大赦制長興三年正月一日已前
諸道兩稅殘欠物色並宜除放或有先曾經災沴處逃
戶却歸業者除見徵正稅外不得諸雜科徭應係省司
場稅倉庫今日已前諸色敗闕人等據其所有錢物家
業盡底收納已上所欠并敗闕人等並放

九月勅曰朕自恭臨萬國惠撫兆民遵上古清淨之規
削近代繁苛之政兩稅之外別無徵歛之名八年之間

繼有豐穰之瑞覩流亡之漸復謂富庶之可期爰自今
秋偶憊時雨郡縣累陳於災沴關梁亦奏於逃移良由
朕刑政或差感通不至責躬罪已靡忘於懷特議優矜
庶令安集據河中同華耀陝青齊淄絳萊等州各申災
旱損田處已令本道判官檢行不取額定項畝如保內
人戶逃移不得均攤抵納本戶租稅其稅子如闕本色
許納諸雜斛斗芻黍元每斗折粟八升今許納本色稗
子特與免稅前件遭旱州府據檢到見苗仍恐輸官不

迨今祇徵一半稅物仍許於便近州府送納其餘一半
放至來年其逃移戶田產仰村鄰看守不得殘毀必在
方岳羣后州縣庶官各體憂勤共相勉勵明詳獄訟恭
守詔條上荅天災必思於戒懼下除民瘼必務於撫綏
當共卹於疲羸勿自安於逸樂

末帝清泰元年四月詔蠲放長興四年十二月已前天
下所欠殘稅

七月庚午詔曰朕嘗領藩條屢親政事每於求理務在

卹民况今子育萬方君臨四海日慎一日思漸致於小
康雖休勿休冀終成於大化得不察生靈之疾苦知稼
穡之艱難俾蠲積弊之原庶廣惟新之澤省三司使奏
自長興元年至四年十二月已前諸道及戶部營田逋
租三十八萬八千六百七十二端匹束貫斤量或頻經
水旱或併值轉輸悉至困窮感成逋欠加以連年災沴
比戶流亡殘租空係於簿書計數莫資於經費蓋州縣
不公之吏鄉閭無識之夫乘便欺官多端隱稅三司使

惠其僥倖便欲推尋朕憫彼蒸黎慮成淹滯示體物
憂民之旨徵滌瑕盪垢之文特議含容且期均濟應自
長興四年已前三京諸道及營田委三司使各下諸州
府縣除已納外並放應有逃戶除曾經釐革外所有後
來逃移者委所在觀察司使刺史速下本部徧令招撫
歸業除放八月後至五年八月並得歸業所有房親鄰
近佃射桑田不得輒有占據如自越國程故不收認其
所徵租稅却從清泰元年四月後委三司重行釐革別

議施行舉賞罰之明條立徵催之年限不得更欠租稅致啓倖門勉懷成務之勤以副劇繁之選有要行事件三司畫一聞奏仍報中書門下不得漏落

十月癸未詔河中居民屋稅蠲除其半丙午又詔振武新州河東西北邊經契丹蹂踐處放免三年兩稅差配時契丹初退故也

十一月乙未蔚州言州界經契丹蹂踐處乞蠲除差稅從之丁未又詔曰朕猥將寡昧虔嗣宗祧草木虫魚思

宏於覆育東西南朔同切於綏懷睠彼契丹孤我恩信
忽驅族類擾亂邊陲殺害生靈窺窬保障唯貨財是視
殘疾是行逞虐肆克莫甚於此人神之所共怒天地之
所不容今則上將臨邊眾軍大集克日必成於盪定望
風已報於奔逝雖料彼戎兵他日終期於掃蕩而顧予
生聚此時方抱於瘡痍或骨肉分離或邱園荒廢凝旒
載想過在朕躬將却復於阜籛宜特行於卹隱應振武
新州河東西北邊經契丹蹂踐處百姓兩稅差配今日

後並放三年宜令逐處長史分明曉諭其人戶陷蕃者宜令設法招尋各令歸復稱朕意焉

二年七月滄州言續逃亡戶八百五十九詔魏府於稅率內蠲減旱故也

九月詔蠲除許州去年殘租

十月詔河中居民屋租蠲除其半

晉高祖以後唐末帝清泰三年十一月十二日即位制曰昨以寇戎久在郊境頗傷禾稼宜減賦租應近京畿

五十里內委逐處令長檢覆當與免今秋稅租差科
天福元年閏十一月壬午詔曰昨者舉義之地稱師之
邦必蹂踐於川原要畚蠲於輿賦其河東管內諸縣稅
租自今年秋及來年夏稅各與減放一半警蹕經過之
地望幸雖榮蕃漢雜處之兵禁暴難備既頒渥澤須示
優矜昨大軍兵士自河東以至京畿沿路蹂踐之處宜
委逐處長吏公同檢覆據頃畝特與蠲放今年秋稅一

半

二年四月丁亥詔曰凡闕布澤務在及民宜加軫憫之
恩俾遂蘇舒之望天福元年以前諸道州府應係殘欠
租稅並特除放諸道係徵諸色人欠負省司錢物宜令
自偽清泰元年終已前所欠者據所通納到物業外並
與除放或水旱為災蟲螟作沴儻無軫恤何致阜豐朕
昨行至鄭州滎陽縣界路旁見有蟲食及早損桑麥處
委所司差人檢覆量與蠲免租稅河陽管內酒戶百姓
應欠天福元年閏十一月二十五日已前不敷年額麴

錢並放其諸處應經兵火者並與指揮天下百姓有年八十已上者與免一子差徭

甲午勅自偽清泰元年終已前場園官所欠係省錢物據盡底通納到物業外四月五日恩制並與除放其人任逐穩便不計省司及外藩府永不得錄任

五月勅應維京及魏府管內所徵今年夏苗稅物等朕自臨御寰瀛躬親庶政靜惟師古動欲便民雖物力方虛每牽經費而田疇微損亦欲矜蠲朕見維京內麥苗

今春稍似旱損尋覩魏府奏報境內亦有微傷須耶示於優饒冀克諧於通濟比欲差官就檢又恐生事擾人其雒京魏府管內所有旱損夏苗縣分特於五分中減放一分苗子其餘四分仍許將諸色斛斗依倉式例與折納所期渥澤以及衆多報告人戶各令悉知

八月乙巳敕制魏府管界內今年夏稅近指揮祇徵五分今以放駐兵師不無勞役宜並蠲放

三年八月癸未定州奏境內旱民多流散詔曰朕自臨

寰宇每念生民務切撫綏期於富庶屬干戈之未戢慮徭役之或煩以彼中山偶經夏旱因茲疾苦遽至流移達我聽聞深懷憫惻應定州所奏軍前夫役逃戶夏稅並放已丑戶部奏河南同州絳州等處相次上訴為管界災旱逃却人戶勅朕奄有四方尊為萬乘所務誕敷教化普濟黎元蓋全師致討於妖狂而比戶未臻於富庶仍聞關輔偏屬旱災致使鄉村多有逃竄達我聞聽深用憫傷宜加矜卹之恩俾遂歸還之計應三處逃移

人戶下所欠累年殘稅并今年夏稅差科及麥苗子訟
徵諸色錢物等並放其逃戶下秋苗據見檢到數不計
是元額及出剩頃畝並放一半仰觀察使散行曉諭專
切招携應歸業戶人仍指揮逐縣切加安撫免施惠養
副我憂勤

九月詔以魏府范延光出降其府城四面人戶三十里
內與放二年秋夏租稅三十里外委逐縣令佐專切點
檢如實曾經砍伐桑柘毀折屋宇者分析申奏盡與蠲

放租稅

十月戊戌赦勅侵官潤已爾其有誅督責暴徵我所不
悉應係欠省司課利場官院等宜依近行宣命期限磨
勘徵督內有送納所欠錢物得足者其餘限愆罪特放
如有沒納本人及本人家業盡抵外尚欠錢物更無抵
當者其所欠並與蠲放其逐人罪犯特從減等其去年
降宣命月日後來欠負者不在此限昨以水旱為沴什
一未均冀便蒸黎因令檢覆未明公法或彰隱漏之愆

爰念小民宜示矜寬之典近因檢田有隱漏合當罪犯者並放所有合罰令倍納租稅者特放並令却依實頃畝輸納貨泉所聚徵督必行况係省之逋懸宜應期之供辦但以兵戈之後帳籍空存已行蠲減之恩常憂未普再示優饒之命式表推恩天福元年應經災處州府諸色場院因茲失陷錢等先曾指揮蠲一半者今並全放未曾經減放者今與蠲放一半天災或降地分所招携老幼以流離棄田園而蕪沒深懷惻憫宜示招安蒲

同晉絳滑

缺

魏府鎮定州等人戶或經亢旱或屬兵戈

逃移人戶等應逐戶所欠今年已前諸雜稅物並特除

放宜令縣州曉示招携如有復業者仍放一年秋夏稅

二年諸雜差徭爰自攻圍每多徭役或因兵死尚有戶

存言念傷痍屢宜優卹應差赴魏府城下人夫內有傷

重身死者除已經支贈外特放戶下三年諸雜差徭又

頃因借率猶有逋懸方務優饒豈宜徵督先率借錮京

舍錢其所欠並放又諸道州府營田戶部院務省莊等

天福元年秋季夏租課錢帛斛斗諸雜色物等除已納外
應有逋懸欠並與蠲放

五年正月丁卯朔帝受朝於崇元殿降制曰朕自勉副
羣心恭臨大寶承歷代荒屯之後屬前朝喪亂之餘每
務綏和漸期富庶壽以東遷梁苑北定鄴都國力既虛
軍資甚廣所司以供億為念督責是專嘗思凋弊之民
倍軫焦勞之意今我事漸簡農時欲興將導達於休和
用頒宣於渥澤宜蠲宿負以惠黎元應天福元年終已

前公私債欠一切除放

七年二月癸酉詔曰朕自臨天下每念民間御一衣思蠶績之勞對一食想耕耘之苦而况職官俸祿師旅資糧凡所贍供悉因黔庶得不救其疾苦憫彼災傷徵宿久慮流離者不歸均殘租恐貧饑者漸困今春膏雨繼降農作方興宜示渥恩俾蘇疲瘵天福二年至四年夏秋租稅一切除放

八月己亥車駕幸鄴壬寅制曰歲因災沴民用艱辛久

係逋懸宜示蠲免應欠天福五年終已前夏秋租稅并
法徵諸物及營田租課並與除放應沿路有傍道稍損
却田苗處其合納苗子及沿徵錢物等據畝數並與除
放主掌曠敗錢物逋懸宜示矜容聊加蠲免應天福三
年終已前諸色場院官欠負官中錢物人等累經徵理
通勘實無錢物家業者並與除放其人免罪任從逐便
不得再任使無黨無徧徇至公之道去泰去甚誠求利
之心私下債負徵利已及一倍者並與除放如是主持

者不在此限邊陲管界蕃部經由言念疲羸良深軫卹
欣代蔚并鎮州管限內有經蕃部踐踏却苗稼者其合
納苗子訟徵錢物等據頃畝與除放其經燒熟屋舍殺
傷人命者據戶下合徵苗稅並與除放

少帝以天福七年七月即位赦制蟲蝗作沴苗稼重傷
特示矜蠲俾令蘇息應諸道州府經蝗蟲傷食苗稼者
並據所損頃畝與蠲放賦稅

八月詔曰叛逆之臣必行於討伐凋傷之俗宜示於撫

綏一昨逆賊安從進不戒滿盈輒謀違背占據城壘虐害人民元兇已就於嚴誅比屋宜加於霑澤俾令蘇息用示軫傷應在城人戶除已行賑貸外特放今年秋來年夏城內物業上租稅其城外下營寨處或有砍伐却桑柘及毀折却屋舍處特與除放今年來年二月合係租稅其管內諸縣人戶等被安從進數年誅剝多是貧寒應天福七年夏稅已前諸色殘欠及訟徵錢物并公私債負等並與除放

九月又詔襄州城內人戶今年秋來年夏屋稅其城外
下營處與放二年租稅應被安從進脅從者一切不問
十一月宣所司廣晉州至雒京汭路應靈駕經過處州
縣分蝗蟲食外秋稅已納外放一半

八年二月河中府奏逃戶七千七百五十九勅諸州應
欠天福七年夏稅並與除放秋放一半其餘一半候到
蠶麥納逃戶與放一半差徭却令歸業是歲天下饑河
南穀價暴加人多饑殍故有此除放

十月遣殿直四人齎詔勅西道示諭除放是歲殘欠稅物

開運元年七月辛未詔魏博貝冀滄景德等州經敵騎剽攘者放今年秋稅其餘經過之地亦量與矜蠲閏十二月詔以平青州楊光遠應王師攻討逆賊下寨之處所有田苗桑棗應遭蹂踐砍伐宜令官吏子細通檢除今年欠苗外來年夏稅並與權放一半其青州三十里內更免今年秋夏殘租應青州管內及鄆齊棣兗沂密

等州諸道人戶自討伐以來科配頻併其今年夏麥殘
欠并泐徵錢物並與除放其城內屋稅特放一年應洞
子頭及城下夫役有遭矢石致死者宜令逐處長吏子
細勘會與放二年徭役

二年五月丙申朔詔曰自今年契丹犯境以來有人戶
實經殘殺者其夏稅十分已令減放二分苗子并泐徵
錢物今更特減一分其正稅錢物亦與十分內減放二
分場院積弊官吏承寬致課額之逋懸勞朝廷之徵督

久淹刑獄深軫予懷爰示優容俾令除放其安邑解縣
兩池前權鹽使王居敏王景遇界分見禁般鹽欠折軍
將兩界通懸累年禁繫宜令三司各詳逐人所欠如有
家業錢物填納者可與盡底據數納官餘欠並放如有
欠負錢物內今無家業錢物填納者所欠特放河中府
雍同華陝虢等州管界內人戶有欠王居敏王景遇般
鹽腳價者並特放

三年九月宣開封府霖雨不止宜令放京城內外人戶

一月房錢

漢高祖以晉天福十二年五月自晉陽趨東京至趙城
洪洞百姓以駱從朗不順皆藏匿山谷所在灰燼有遺
堵焉及帝還京咸相繫來詣行輿斗萬歲者響震川陸
帝哀之咸與蠲其租調至開運四年二月即位於晉陽
六月詔應天福十一年已前諸州府應係殘欠租稅並
特除放又曰東西兩京一百里內今年夏稅及汭徵諸
色並與蠲放其一百里外曾有契丹蹂踐處其今年夏

租大小麥苗子泐徵諸色各放一半其京城內今年屋
稅與減放一半

乾祐元年正月乙卯詔鄴城四面人戶三十里內所有
天福十二年稅賦并泐徵一物已上並可特放

隱帝以其年二月辛巳即位已巳詔應天福十二年終
已前殘欠糧夏稅賦及和糴泐徵一物已上今並令特
放所有開封府滑曹鄆宋亳鄆鄆潁徐宿兗沂密孟鄭懷
衛復濮等州并鄴城四面三十里內共二十處除已放

去年殘稅外其今年麥苗子於舊額上特與放一半項
經戎虜所在經搔至於場院課城州府官係既有陷失
宜示矜蠲應州府縣鎮遭契丹草寇及軍都更變驚却
兼有般送綱運已離本處公路遭劫奪諸色錦帛一物
已上兼天福十二年六月終已前諸州府鹽麴商稅鐵
冶不敷課利及主持錢物糧草柴蒿敗闕欠折等一切
特與除放諸道州府有去年六月終已前全放支却將
士春冬衣賜及諸色請受自來累行徵納者並與檢驗

除放天福十二年六月終已前諸處收刈到芟草積年損壞及欠少處並令除放

二年二月勅先以兵甲至多糧儲不給權放苗畝之上遂有紐配之煩雖年歲之豐登諒黎民之艱窘固非獲已深用軫懷今則雨雪及時陽春布澤宜順發生之令特覃優卹之恩冀閭里之安居俾農桑之樂業應三京鄴都諸道州府所徵乾祐元年夏秋苗稅及紐徵白米稗草據今年二月一日已前已納外見係欠數並宜特

放布告遐邇體朕意焉

周太祖廣順元年正月即位制漢晉以來兵革屢動賦役煩併黎庶瘡痍鰥寡孤惸不能自濟為人父母曾不憫傷應天下州縣所欠乾祐元年二年己前夏秋殘稅及泐徵物色并三年夏稅諸色殘欠並與除放所有澶州以來大軍經過之時泐路人戶恐有蹂踐其官路兩邊共二十里并乾祐三年殘欠秋稅並放應河北綠邊州縣自去年九月後來曾經契丹蹂踐處其人戶應欠

乾祐三年終已前積年殘欠諸色稅物並與除放

四月乙亥徐州言彭城縣訴收城時兵士踏踐麥苗乞
聊減稅從之

二年正月丙申晉州王彥超奏乞除放去年十一月十
二月商稅鹽務課利從之乙巳陝府折從阮言奉勅除
放賊軍蹂踐人戶賦租

五月平定州詔曰賊據一城民殘四境或徹毀其牆屋
或蹂躪其田疇既於徵取供軍點集役應并宜矜卹俾

漸蘇舒應兗州城內所徵今年屋租及蠶食鹽錢諸色雜物稅並與除放城外官軍下寨處四面去州城五里內所徵今年夏秋苗子蠶食鹽錢並諸雜泐徵錢物並與除放五里外十里內除放今年夏苗子三分中減放一分諸州差到人夫內有遭矢石身死者宜令遂州縣分折姓名聞奏放戶下三年諸雜差遣

三年正月乙亥勅放都下浮客食鹽錢戊戌詔諸道州府先納人戶軍器物並放

五月滄州言營田務戶納去年空地苗稅不迨乞除放從之

世宗顯德元年正月帝南郊禮畢詔曰諸州府廣順二年已前逋欠稅訟徵錢並放其二年終已前主持省錢及主倉庫敗闕者據納家業外無抵當者並釋放

三月詔曰兩京及諸道州府人戶所欠去年秋夏稅租其訟徵物色並與除放

四月世宗攻河東庚午於潞州詔曰當州諸縣及澤州

數縣昨經賊軍傷踐處人戶所徵今年夏稅斛斗錢帛
三分與放一分內有村坊元不遭軍寇傷踐者不在蠲
放之限

十月癸亥帝謂侍臣曰昨諸道戶民有詣闕訴水災者
因遣使按之令賾奏報有此舊額出剩者今歲豐熟必
可輸納或他時小有不稔便因編氓所檢出頃畝宜令
三司補舊額外與減一半

二年十一月秦鳳州平詔應秦鳳階成等州管內顯德

二年十一月己前城下功役百姓為矢石所害者本戶除二稅外放免三年差役今後除秋夏兩稅徵科外應為屬所立諸般科率名目及非理徭役一切停罷

三年六月詔曰應諸州夫役自來有沒於矢石者其本戶並放免三年差徭

四年正月詔曰諸道州府應欠顯德三年終己前秋夏稅物並與除放諸處敗闕場院人員自來累行徵督尚有逋欠實無抵當者宜令三司具欠分析數目聞奏別

侯指揮

三月壽州降唐戊詔壽州管內去城五十里內與放今年及明年秋夏稅租

五年五月世宗以征淮迴降德音云用兵之際力役是供當矜貸之在辰諒優給之宜被自去年十月後來汳淮人戶曾充夫役內有遭傷殺不迴者本家放免本戶下三年諸雜差徭江南疲俗克復方新特示蠲除俾令存濟楊泰通滁和濠泗楚光壽舒廬鄆黃等州連水濮

陽汶川等縣自去年終已前所欠秋夏殘稅及諸色徵科配歛博徵物色等並與除放

六年二月丁亥開封府上言舊額下稅苗一十萬二千餘頃今檢到羨苗四萬二千餘頃奉勅放三萬八千頃是時諸州檢苗使率以所檢到羨苗上奏帝皆命減放其分數大約如是

冊府元龜卷四百九十二